

送臣傳



送

通

傳



國史館繕本

逆臣傳

都城琉璃廠半

松居士排字本

逆臣傳總目

卷第一

吳三桂

馬

寶

王屏藩附

李本深

卷第二

張國柱

楊遇明等附

曹申吉

羅森等附

王輔臣

譚

洪

子譚五秘
鄭蛟麟附

祖澤清

耿精忠

曾養性

劉秉政附

卷第三

劉進忠

尙之信

嚴白明

孫延齡

馬

雄子承廕
郭義附

線國安

卷第四

姜瓌

李建泰

金聲桓

章于天

李成棟

鄭芝龍

劉澤清

馬逢知

逆臣傳目錄終

逆臣傳

目錄

逆臣傳卷之一

吳三桂列傳

吳三桂遼東人父襄明崇禎初官錦州總兵三桂由武舉隨征陣累敘秩後襄坐失機下獄擢三桂總兵以守寧遠有功欲倚以禦流賊封平西伯竝起襄提督京營令薊遼總兵王永吉徙寧遠兵五十萬入衛三桂畱精銳殿後甫至山海關聞流賊李自成陷京師入衛兵已潰不敢前自成脅襄以書招之乃進次灤州先是三桂嘗就嘉定伯周奎飲悅歌女陳圓以

千金購之間邊警遘行奎送圓于襄所至是爲賊將
劉宗敏掠去三桂聞之作書絕父馳歸山海關遣副
將楊坤遊擊郭雲龍來我

朝借師時順治元年四月睿親王多爾袞奉

世祖章皇帝命統師至寧遠三桂上書曰流賊逆天犯闕僭

尊號罪惡已極天下共憤三桂受國厚恩欲與師問
罪奈力弗敵爰泣血求助乞王速整旅入關與三桂
合兵直抵都城掃除虐焰昭示大義此千載一時也
睿親王得書許卽進兵且曰伯誠率衆來歸當裂土

封王三桂聞自成執襄置軍糾衆二十萬東益發使
趣大兵距山海關十里三桂以賊分趨關外來告睿
親王遣兵擊賊于一片石賊敗遁明日三桂率衆迎
睿親王令三桂兵肩繫白布爲識遂統師入關自成
營北山橫亘至海大兵對賊布陣三桂居右翼未悉
出精銳搏戰至大風揚沙戰良久未決大兵呼聲再
振風止從三桂陣右衝賊中堅騰躍合擊大破賊追
奔四十里是日睿親王令關內軍民皆薙髮稱三桂
爲平西王分隸步騎兵萬先驅討賊自成遂殺襄于

永平返京師盡屠襄家屬載輜重遁三桂與英親王
阿濟格追至望都屢戰皆捷賊走山西乃班師

世祖御皇極門授平西王冊印設宴

賜銀萬兩尋以英親王爲靖遠大將軍三桂從由邊外趨綏
德二年克延安鄜州勦自成于襄陽武昌東下九江
召還京宴勞

命赴鎮綿州三桂以所給田多磽薄請益復爲所屬將校何
進忠楊坤郭雲龍吳國貴高得捷等百二十餘人請
世職屬吏童達行陳全圖許榮昌錢法裕等請優擢

又以父襄母祖氏第三輔俱爲自成戕乞

贈卹並得

旨俞允三年入

覲

賜銀貳萬兩五年

命移鎮漢中六年與都統李國翰敗賊于階州剿宜君同官

滿城宜川安寨清潤定邊榆林府谷賊次第平八年

八月入

覲

賜金冊金印

敕偕國翰征四川流賊張獻忠之滅也餘黨孫可望李定國

白文選等遁川南因明桂王朱由榔稱帝于粵降附之並竊王號擁驍健擾川北九年三桂分兵復成都嘉定敘州重慶就鎮綿州久駐師可望糾猺獠五萬圍保寧巡按御史郝洛告急三桂移兵擊走之奉詔頒賚將士私以冠服與洛洛不受疏劾三桂擁兵觀望狀三桂摘疏中親冒矢石語劾洛欺罔冒功洛坐謫徙三桂敘功歲增俸千兩子應熊尙主爲和碩駙額授

爵三等子尋加少保兼太子太保十四年定國隨由
榔入雲南可望與定國隙戰敗赴長沙大軍降

敕三桂

爲平西大將軍國翰爲定西將軍進征貴州十五年

發漢中過保寧順慶至合州盡獲沿江戰艦定國等
據石壺關拒險三桂令騎行山麓步陟巔以礮發其
伏悉驚潰遂下遵義克開州國翰卒三桂還駐遵義
時經畧大學士洪承疇寧遠大將軍宗室洛託由湖
廣進貴陽征南將軍卓布泰由廣西進都勻安遠大
將軍信郡王多尼統禁旅至三桂馳會于平越府之

揚老堡議三路出師三桂自遵義赴天生橋關聞文
選據七星關遂繞出烏撒土司境進霑益川信郡王
進曲靖府敗文選卓布泰進羅平州敗定國十六年
正月合攻雲南城由榔奔永昌二月三桂同貝勒尙
書卓布泰進征南州破文選于玉龍關渡瀾滄江下
永昌由榔先遁我兵渡潞江偵定國設伏磨盤山分
八隊迎擊斬殺過半乘勝取騰越州追至南寧乃振
旅由永昌大理姚安還由榔部將馬寶李如碧高起
隆劉之復塔新策王會劉偁馬惟興楊武楊威高應

鳳狄三品等及景東蒙化麗江東江東川鎮雄諸土司先後歸順

詔三桂鎮雲南信郡王與卓布泰等班師留都統伊爾德卓羅等分軍駐守並

諭吏兵二部凡雲南省文武官舉黜及兵民一切事

命三桂暫行總管俟數年後補授仍照舊例時由榔奔緬甸文選奔

木邦定國欲迎還由榔緬人不許定國脅以兵緬人益固拒乃屯孟艮復謀入滇以由榔印劄誘元江土司那嵩內應那嵩遂與降將高應鳳倡叛十月三桂

由石屏進圍其城掘壕困之逾月乃破斬應鳳那嵩
自焚死以其地爲元江府十七年部臣會計雲南省
俸餉歲九百餘萬議檄滿洲兵還京裁綠旗兵五萬
之二三桂謂邊疆未寧兵力難減宜如舊時三桂陰
懷異志其藩下副都統楊申說以先除由榔絕人觀
望三桂乃疏請發兵入緬殄滅由榔其畧曰前者密
陳進兵緬甸事奉

諭曰若勢有不可慎勿強又

諭曰務詳審斟酌而行臣今籌畫再三竊謂渠魁不殄有三